

ԿՈՄԻՏԱՍԸ ԺԱՄԱՆԱԿԱԿԻՑՆԵՐԻ ՀՈՒՇԵՐՈՒՄ ԵՒ ՎԿԱՑՈՒԹՅՈՒՆՆԵՐՈՒՄ

Հրատարակության պատրաստեց
ԳՈՒՐԳԵՆ ԳԱՄՊԱՐՅԱՆԸ

ՄԱՐԳԻՍ ԽԱՉԵՆՑ . ՓՐԻՆԹՆՅՈ
ԵՐԵՎԱՆ 2009

Էջ 56-78

ՄԵՍՐՈՎԲ ՄԱՐԱՆՁԵԱՆ

ԿՈՄԻՏԱՍ ՎԱՐԴԱՊԵՏ

(Էջմիածնայ ճեմարանի իր հասարակ աշակերտներին մեկի յիշողություններ)

Սիրելի Օր. Մարգարիտ Բաբայեանին

Տասը տարեկան մանուկ էի 1903 թուին: Խառն օրեւ էին իմ հայրենի Գիւմրի քաղաքին մէջ: Մեր մեծերը գերագրգռուած էին, ցասումի մէջ, սակայն մեզի, փոքրերուս ոչինչ չէին բացատրեր: Դպրոցին մէջ մեր ծերունի վարժապետը, նշանաւոր Ալեքսան Խալֆան, լուռ էր և ոչ մէկ ակնարկ կ'ըներ անցքերու մասին:

Դասարանի պատէն կախուած Նիկոլա կայսեր նկարը մատով ցոյց տալով, աշակերտներէն մէկը ըսաւ:

«Ամէն բան էնողն էս է, մեր ժամերու գանձերը խլեր է, մեր դպրոցները կը փակէ»: Չարութեան առանձին արտայայտութիւն չտեսնելով թագաւորի երեսին, այդ լուրերուն կարևորութիւն չտուի:

Մէկ օր ալ, խլրտումներ, աղմուկ: Մարդիկ փողոցներու մէջ կը վազէին զանազան ուղղութիւններով: Սև դրօշակներ, իրարանցում: Ռուսական ձիաւոր զօրքը սուրաց մեր ուղղութեամբ: Զօրահանդէս չէր: Զինուորներն անմիջապէս սկսեցին մտրակել ժողովուրդը: Մինչև փախուստի պատրաստուիլս, զինուոր մը հասաւ և ուսիս հասցուց մտրակի մի հարուած: Ցաւէն լեզուս չորցաւ: Դպրոցէն շուտ մը ներս խուժեցինք և մեր բարկութիւնը թագաւորի նկարին վրայ գործադրելով՝ բզիկ բզիկ ըրինք զայն:

Դարձանք յեղափոխական:

Մեր տուններէն ներս ամենը միաբերան կ'անիծէին թագաւորը, որն հայերուս գլխուն ասանկ փորձանքներ կը թափէ: Ծեր տատիկս ձեռքերը վեր բարձրացուցած շարունակ կ'աղօթէր Խրիմեան Հայրիկի արևշատութեան համար և աղօթքը կը վերջացներ. «Վո՛ւյ, լո՛ւսդ քոռանայ, Նիկոլ թագաւոր, թաղթդ գլխուդ փլի, որ մեզի էս օրին հասուցիր, գրողն յերեսիդ»:

Ամեն տեղ կը լսէինք Խրիմեան Հայրիկի անունը և ամեն տունի մէջ կը տեսնէինք անոր մեծ նկարը:

Քիչ ետքը լուր եկաւ, թէ Հայրիկը կուգայ:

Օրեր առաջ եռ ու զեռ մեր քաղաքին մէջ: Ամենքս եռանդով սկսեցինք յաղթական կամարներ շինել: Մեր սակաւաթիւ ծառերը զրկուեցան իրենց սաղարթէն: Ծաղիկ չմնաց պարտէզներու մէջ: Տուներու ճակատները զարդարուեցան խալիներով և Հայրիկի պատկառազոր նկարներով:

Հայրիկն եկաւ յաղթական, պարթևահասակ, հպարտ կեցուածքով, բարի խոշոր աչքերով: Ամենուս հայրը, մեր պաշտպան-ապաւէնը - ատանկ կ'ըսէին մեր մեծերը - խաչը ձեռքին, փայլուն խաչը ճակատին:

Բազմութիւնները փառաբանեցին Հայրիկը աղաղակներով, երգերով, ծափերով, պարերով, իր ոտքերուն տակ ոչխարներ մատաղ ընելով:

Ուստա Սողոմոն

Երեկոյեան ծովածաւալ ժողովուրդը շրջապատած էր Առաջնորդարանը, կողքի բոլոր փողոցները լեցուն էին չտեսնուած բազմութեամբ: Շրջապատի խանութներու երդիքները լեփ լեցուն էին: Պատշգամի ճիշդ դիմացը տեղ բռնեցի: Պարթևահասակ Հայրիկը քանիցս դուրս եկաւ, օրհնեց, խաչակնքեց, ճառեց ինծի անհասկանալի լեզուով: Ժամեր տնեցին ծափերն ու երգերը - «Հայրիկ, Հայրիկ, քո Հայրենիք, Վասպուրական մեր աշխարհ»...: «Հայր մեր» երգուած ամբողջ ժողովուրդէն: Զուռնաճիւղները մեր անուանի անդադար նուագեցին ու երգեցին:

Յանկարծ ժողովուրդի մէջէն ձայներ բարձրացան, «Սողոմոն, ուստա Սողոմոն», ծափեր, կանչեր:

Դուրս եկաւ պատշգամ սև չուխայով, նիհար, բարձրահասակ, արագաշարժ մի երիտասարդ: Ճաղատ գլուխը կը փայլէր լամբարներուն լոյսի տակ, տարօրինակ կարճ մօրուքով և կտրած պեխերով: Զուռնան պար կը նուագէր: Կարծեցինք, թէ պիտի պարէր և ծափ տուինք: Չպարեց: Մարդը «Ուստա Սողոմոն» էր: Կրակոտ աչքերը աջ ու ձախ ցայելով, ձեռքի մի կտրուկ շարժումով կայծակի արագութեամբ լռեցուց աղմուկը: Լռեց զուռնան: Մութ կապոյտ երկինք, վառվռուն աստղեր, վարը հազարաւոր հայ վառվռուն աչքեր և լարուած լսողութիւն:

Սողոմոն սկսաւ երգել - «Հո՛ւ արե՛ք, սարեր ջան»: Պապանձուեցանք ամենքս: Քովիս մարդիկ ականջ դարձած, հև ի հև կը լսէին, մերթ շունչը բռնած, մերթ խորաշունչ, ա խ

քաշելով: Յափշտակութենէս մարմինս փշաքաղուեցաւ, սարսուռը բարձրացաւ ողնաշարս ի վեր, անցաւ գլուխս և դուրս թափուեցաւ արցունքի հեղեղով:

Երգն անծանօթ էր մեզի, սակայն՝ հարազատ: Լուսնեան մէջ խորհրդաւոր երգի ոլորտները ուռճացան, երկինքը բռնեցին, արձագանգները շատ հեռուները գնացին:

Երգը վերջացաւ: Ուստա Սողոմոնը ներս փախաւ: Ծափեր, նորէն կանչեր, հուռոտներ: Նորէն կրկնեց սքանչելի երգը, բազմիցս, այնպէս, որ ամենքս սկսեցինք իր հետ երգել: Ստիպեցինք, ուրիշ երգեր երգեց, մէկը միւսէն սիրուն, հմայիչ: «Միրտս նման է», «Արօրն ասաց» և ուրիշներ: Մոռցանք ամեն ինչ, մոռցաւ ժողովուրդն «իբր դարդերը», մոռցանք մենք մեզի, մոռցանք նաև մեր Հայրիկը: Սողոմոնը իր կաքաւի գեղգեղանքով ամենքս ձուլեց իր երգի մէջ, երգ դարձանք ամենքս: Երգի սիրահար, երգ ստեղծող ժողովուրդը գտաւ անսպասելի գանձը, իր հարազատ երգիչը:

Կողքիս ծերուկը իր մեծ կարմիր թաշկինակով աչքերն ու թրջուած մօրուքը շարունակ սրբելով քանիցս աղաղակեց. «Ջան, Սողոմոն, վայ, ես քու հոգիդ ուտեմ»:

Մինչև ուշ գիշեր մնացինք: Այլևս գուռնաները լռեցին Սողոմոնի երգէն վերջ: Հայրիկը նորէն դուրս եկաւ, օրհնեց և հրամայեց տուն գնալ: Չիմացանք՝ ով էր այդ «Ուստա Սողոմոն»-ը, այդ վարպետը: Որմնաղի՞ր էր, դերձա՞կ, թէ աստաղձագործ: Ինքն անյայտացաւ, գնաց մեր քաղաքէն, թողնելով մեզի իւր երգերը: Գիւմրեցիք ունենալով սուր լսողութիւն, Սողոմոնի երգերը գրաւեցին ամբողջ Գիւմրին, երգերը տիրացան մեր հոգիներուն:

Երկու տարի յետոյ, ճեմարանն ընդունուած, հեռու իմ սիրելիներէն, նեղուած անհաճելի օտթէն, միակ մխիթարութիւնս էր նոր ընկերներուս հետ խաղալը:

Ճան կը խաղայի իմ ընկեր Զանգեզուրցի Ամասիայի հետ: Վէզս նետելով առաջ, այդ ուղղութեամբ աչքիս ընկաւ մի մարդ, որ կը սուրար դէպի մեզ: Երկար, նիհար մի մարդ: Երկար փէշերով տարօրինակ չուխայով, բայց ճաղատ գլուխ...

Ճաներս թափած՝ առաջ վազեցի:

-Ուստա Սողոմոն:

Ան էր, մեր Գիւմրու Սողոմոնը, մեր երգիչը:

Մարդը զարմացաւ, սակայն զուարթութեամբ հարց տուաւ.

-էդ ո՞վ է Ուստա Սողոմոնը:

-Դո՛ւ ես, ուստա՛ ես քեզի կը ճանչեմ: Դու մեր քաղաքը «Հով արեք» երգեցիր Հայրիկի եկած օրը:

-Ա՛յ դո՛ւ, Ուստա Սողոմո՛ն, Գիւմրեցի Կոռ -ըսաւ ու գլուխս թնի մէջ առնելով «Բողկ հանեց», ծալած բթամատը ուժեղ սեղմելով մագերուս վրայ և ստորակէտ գծելու արագ շարժումով սուր ցաւ պատճառեց: Մարդն անյայտացաւ արագ դէպի վանքի պարտէզը, ինչպէս մի մրրիկ, – ցաւը մնաց գլխուս վրայ:

Գլուխս բռնած, զարմացած կը նայէի ետեւէն:

Ամասիան խնդալով յարեց.

-Իշու գլուխ, ի՞նչ ուստա Սողոմոն, դա մեր ուսուցիչն է, Կոմիտաս վարդապետը:

Ի հարկէ, չհաւատացի:

Երկու օր վերջ կանչեցին երգչախումբի համար նորեկներու ձայները փորձելու: Ներս մտայ դահլիճը և շշմած նայեցի դաշնակի առաջ նստած մարդուն, որ նոյն ինքն ուստա Սողոմոնն էր - այսինքն Կոմիտաս վարդապետը, քահանայի հագուստով և ոչ թէ Գիւմրեցու չուխայով:

Ձայնս փորձեց և ըսաւ.-Գիւմրեցի Կոսն լավ ագռաւի ձայն ունի, բայց շատ սուր լսողութիւն, կ'օգտագործենք իբրև «գրամաֆօն»:

Յետոյ բարձրադաղակ խնդաց, զիս հրեց մի կողմ՝ հետևեալի ձայնը փորձելու:

Շուտով սկսան երգի մարզանքները:

Ինչ երգեր, մէկը միւսէն գողտրիկ, կախարդիչ:

«Հայր Սուրբ» կը կանչէինք իմ «ուստա Սողոմոնը», այդ զուարթ, աղմկոտ, արագաշարժ և կատակասէր սուրբը, որ երգի մարմնացումն էր իր ամբողջ էութեամբ: Երգերուն համահաւասար իր սեփական ձայնը զիս կը յուզէր: Կարծես անմարդկային ձայն լինէր, մեր լեռներու կաքաւանքներու կարկաչիւնը: Հովի պէս թեթև երգել կուտար, միշտ կ'արգիլէր պոռալ, միշտ նուրբ, երկնասլաց:

«Սարերի վրով գնաց, եա՛ր... »: Ով կը յիշէ ինչպէս կ'երգէր Կոմիտասեան խումբը, չի կարող զսպել իր յուզումը, այնքան նուրբ էր երգը և խօսուն, թեթև ինչպէս մշուշը մեր լեռներուն: Ղեկավարելու ժամանակ հայր Սուրբը իր արտայայտիչ ու շարժուն դէմքով նշաններ տալով, իր ձեռքերու ալիքաւոր ճկուն ելևէջներով այնպէս կը մարմնաւորէր երգը, որ աչքիս առաջն կուգային մեր գունագեղ սարերը, կանաչ արտերն ու

ծաղկազարդ հարսները, հեռացող և մշուշի մէջ հաշուող ճանապարհը, որի վրայով կ'երթար լռելեայն այս նուրբ, քնքոյշ երգն հնարող գեղջկուհու ետքը:

Քիչ ետքը կ'երգէինք «Ամպէլ ա, ձուն չի գալիս»: Չափը թեթև, ինչպէս Շողերի քայլերը, յետոյ ձայնը կ'ուժեղանար, կ'ուռճանար և երկնային ճերմակ ամպերու նման կը գալարուէր, վերևը նորէն կը նրբանար, կ'իջնէր: «Անձրևն եկաւ շաղալէն»: Այնպէս, որ անձրևի անոյշ ձայնը կը լսէինք, յետոյ տեսնելու պայծառ արևի տակ, ճառագայթներու տակ փայլող ետքը «Ալ ձին տակին խաղալէն»:

Հապա «Կուժն առայ ելայ սարը», «Էս գիշեր, լուսնակ գիշեր» գողտրիկ հովուերգութիւնը թովիչ: Ո՞ր մէկ երգը թուեմ, ամենը իրենց իւրայատուկ խորաթափանց ոլորտներով մեզի կ'արբեցնէին ուղղակի և մեր սիրտերն ու հոգիները կը լեցնէին գեղջուկ հայ աննման աղջկա անարատ սիրով, աննիւթ, եթերական սիրով, որ դեռ կ'ապրի, մշտադալար ու պայծառ, արդէն ծերացած, սակայն միշտ վառ մնացած հոգուս մէջ:

Չմոռնանք նշել, որ երգերու մեծ մասի հեղինակները մեր քնքոյշ հայ ջահել հարսներն ու աղջիկներն են:

Երբ «Գարուն ա, ձին ա արել» կը ստրվեցնէր շատերս կ'արտասուէինք թէ երգի եղանակէն և թէ բառերու անման ու պարզ արտայայտութենէն: «Գարուն ա», կանաչ դաշտեր, ծաղկած ծառեր, հայ աղջկայ ուրախ, անմեղ սիրող սիրտ: Յանկարծ, անսպասելիօրէն, բութ ու բորան, սառը հողմը կը փչէ, ցուրտ սաստիկ, սառնամանիք և, ո՞վ սարսուռ, «Ձուն ա անում»:

Ձեան հաստ շերտը ծածկած է ծաղիկ ու կանաչ, սար ու դաշտեր: Տիրութիւն, լուռ տեսարան, թռչուններն իսկ չեն երգեր: Խոր, լիաթոք հառաչանքով երգը կը շարունակէ ուժգին «Ա իս, չորնա՛, վա իս, ա՛յ եար, չար մարդու լեզուն»: Ինչ սրտառուչ և յուզիչ բառեր ու պատկերներ, ինչ արտայայտիչ եղանակ: Երգն այնպէս կը ղեկավարէր և այնպէս կ'արտայայտէր, որ ես յուզումէս կը պատկերացնէի թէ իմ սեփական տխրութիւնն է, ինծի է բամբասած, չորնալու արժանի չար լեզուն: Կրկնակ «Վայ, լէ, լէ»-ն կը վերջացնէր վերասլաց նրբութեամբ, մինչև աստիճանաբար երկնքի մէջ կորչող մի հնչիւն: Կարծես երկինք կը նետէր կծիկ տուած նուրբ քօղը տանջուող հայ աղջկայ: Ու յուզումէս կուլայի, ինչո՞ւ ամչնալ, այժմ էլ կուլամ Կոմիտասեան գեղեցկութեամբ յուզուելով:

Մերտաբանի երկար դահլիճին մէջ կը կատարուէին փորձերը: Յաճախ խումբը կը թողնէր, կ'երթար, կը հեռանար, հեռուէն լսելու, նորէն կը մօտենար, կը փոփոխէր: Յաճախ կը բարկանար, երեսը կաս-կարմիր, աչքերն արիւնով լցուած, ոտքերը գետին կը խփէր ցասումէն և կը շանթահարէր զմեզ իր զարմանալի արագաշարժ աչքերով

ամենաթեթև մի թերացման համար: Շատ յաճախ գուարթ կատակներով կ'աշխուժացնէր խումբը իր նշանաւոր կատակներով կամ դէմքի շարժումներով:

Լոռուայ հոռովելներն ու կալի երգերը նշանաւոր փուշն էր մեր խումբի, Հայր Սուրբի իրեն գործունէութեան: Ամենքս հիացած էինք, և հայր Սուրբն իր գոհունակութիւնը ի վիճակի չէր քողարկելու: Չքնաղ եղանակներն ու խօսքերը երգերու կատարեալ պատկերներ էին նկարչական: Գութանաւորներու և կալուողներու սէրը դէպի լծկան անասունները առանձին հաճելի գոյն կուտայ երգին և յաճախ սիրուած եզներու անունները կը լսուին՝ Լաչին, Շիրվան, Շէկօ: Փորձերը շատ երկար տևեցին, այնքան Հայր Սուրբը կ'ուզէր կատարեալին հասնիլ: Վահան Տէր Առաքելեանը մաճկալի մեներգը կ'երգէր իր քաղցր տէնորով, ինչպէս նաև սքանչելի «Ա՛խ, մարալ ջան»:

«Սիփանայ քաջեր»ու փորձերուն ժամանակ շէնք ու շնորհքով պատերազմի կը նմանէին մեր երգերը: Միշտ դժգոհ, մեր զօրավար վարդապետը մեզի կը մղէր, «հատու սուսերը» ձեռքներիս, գրոհով վերցնելու Սիփանայ սարը:

Յոգնաջան, եռանդուն զօրավարն այնքան «արիւն թափեց» և մեր թղթ «սուսերն» այնքան «արիւն քամեց» դժուար փորձ-ճակատամարտներու մէջ, որ մենք ինքներս մեզմէ զգուեցանք այդ աստիճանի «արիւնոռուշտ» լինելուց: Փորձերու վերջը, երբ կը գրաւէինք վերջին քառեակին Սիփանայ կատարը, մեր զօրավար Հայր Սուրբը փոխանակ ուրախանալու մեր «յաղթութեան» համար յոգնաբեկ, ճակատը սրբելով, կէս դժգոհ իր անշնորհք երգիչ-զինուորներէն, ստուերի նման կ'անյայտանար, հետևեալ փորձին թողնելով վերջնական և կատարեալ անարիւն սուսերամարտը:

Եւ յաղթեց մեր զօրավարը ոչ թէ Արաբներ կոտորելով, այլ կոտրելով մեր երգիչներուս կոշտութիւնը:

Զարմանալի դինամիզմ կայ «Սիփանայ քաջեր»ու մէջ: Քրիստոնէայ վարդապետը կրցած է տալ պատերազմի պատկերը երգով: Քանիցս մեզի կը բացատրէր՝ սկիզբը զինուորներու մօտենալը կամացուկ, անաղմուկ «Լօ՛, լօ՛, լօ», համարեա անլսելի: Յետոյ արագացած, երբ թշնամին արդէն գիտէր, տեսած էր, հայ քաջերու ներկայութիւնը, ձայները կ'ուժեղանային, չափը կ'արագանար, ամենքը լիաթոք շնչելով, որոշ տեղեր աղաղակելով իսկ, կուգար սուսերամարտի պատկերը, հրմշտուքը, զարկերու, հարուածներու շաչիւնը, կոտորածը: Վերջը, յոգնած «Սուրբ յագեցած», «Յետ դրին պատեան» և կը վերջանայ հանդէսին ներկայ գտնուողներու խելակորոյս ծափերով, ինչպէս Երևանի համերգին:

«Սիփանայ Քաջեր»ը միշտ համերգի վերջին կտորն էր և կրկնել կուտար հասարակութիւնը քանիցս խելակորոյս:

Զմոռնանք յիշել պատկերը օրինակ Երևանի համերգին: Բեմէն ես ժամանակ ունէի

դիտելու ներկաներու երեսները: Ինչ երեսներ, կատարեալ հրեշտակներու դէմքեր, աչքերու այնպիսի արտայայտութեան երանութեան, որ այսօրուայ նման կը յիշեմ: Գերման մեր քափելմայստրը, հարբեցող և սխտոր հոտող, անճանաչելի էր՝ առաջին շարքը նստած: Դէմքը բոլորովին փոխուած, նուրբ արտայայտութեամբ, համակ լսողութիւն դարձած: Պատանի էի, սակայն հասկցայ երաժշտութեան ազդեցութեան ուժը, ըմբռնեցի հայ երգի մեր անգուգական Կոմիտասի արուեստի ուժը և անոր խոր ազդեցութիւնը մարդուս վրայ:

Ըսի, թէ Ժամանակ ունէի դիտելու հասարակութեան պատկերը, որովհետև Հայր Սուրբը իմ սուր լսողութեանս պատճառով էր դրել զիս խումբի մէջ: Վայրկենապէս կը սորվէի և կը կրկնէի անընդհատ, որ գեղեցիկ ձայն ունեցող ընկերներս սորվին: Համերգներէն առաջ Հայր Սուրբը կը սաստէր զիս:

-«Գիւմրեցի ագռաւ, ձայնդ անլսելի, սուս կաց»: Ես միշտ կիսաձայն կ'երգէի, սակայն ոգևորութիւն կուգար վրաս և մոռնալով յաճախ կը կռաւէի և վայրկենապէս Հայր Սուրբի սաստող հայեացքը նկատելով, կ'իջեցնէի «ձայնս»:

* * *

Դասերիս ազատ ժամերուն կը ձանձրանայի, սիրելիներուս կարօտը զիս կը տանջէր: Օր մը Վանեցիներու ծաղկանոց մարզի մէջ նստած կը դիտէի ծաղիկները և գունագեղ թիթեռնիկները, կը լսէի չինարի ծառերու սաղարթի մէջ թռչուններու համերգը:

Շատ տաք էր օդը: Ինծի թուաց, թէ ես ալ մի թիթեռնիկ եմ, թեթև, այնպէս որ մարմնիս ծանրութիւնը դադարեցի զգալ:

Կիսատ կերածս դեղձն ընկաւ ձեռքէս, այնքան թոյլ էի, որ չկարողացայ վերցնել զայն... և սուգուեցայ անհունի մէջ...

Երբ աչքս բացի, աղօտ կերպով հասկացայ, որ պառկած եմ ամպերու մէջ, ցուրտ և սառն ամպերու և սաստիկ կը մսէի, կը դողայի...

Աչքս նորէն բացի, տեսայ, ով զարմանք, Հայր Սուրբը, նստած անկողնուս կողքը:

-Էհ, ուստա Սողոմոն, ի՞նչպէս ես, շուտ լաւացիր, որ նորից երգել կարողանաս խումբի մէջը գրամաֆոնի պէս:

Ջերմ ունէի, դողերոցք: Տասներկու տարեկան մանուկ էի: Հայր Սուրբն ինքն ալ մանուկ դարձած՝ կատակներ կ'ընէր, զուարթ պատմութիւններ կը պատմէր և յաճախ՝ միմոսութիւններ: Օրինակ ականջները կը շարժէր, ինծի ալ այդ արուեստը սորվեցուց: Գլխու կատարի մորթը կը դողացնէր, այդ մէկը չկարողացայ կրկնել: Դէմքի աջ կողմով

կուլար, միւս կէտով կը խնդար... Զարմանալի կենսութիւն և ուրիշներուն զուարճացնելով օգնող...

Ինծի այցելող միայն Հայր Սուրբն էր և Պ. Յովսէփը, մեր աւագ վերակացուն, մեր երկու դաստիարակները:

Ընկերներս յետոյ ինձ պատմեցին, որ Հայր Սուրբն ինքն էր զիս գրկել ու տարել հիւանդանոց, զիս ծաղկանոցի մէջ ուշաթափ ընկած տեսնելով:

Զարմանալի զուգադիպութիւն: Տասնհինգ տարի ետքը Փարիզի զինուորական հիւանդանոցին մէջ մերձ ի մահ հիւանդ, աչքս բացի և դիմացս նստած տեսայ Կոմիտաս Հայր Սուրբի վաղեմի բարեկամուհի և իր երգերը իր նման երգող, մեր հրաշալի Օրիորդ Մարգարիտ Բաբայեանը, իր մայրը և քոյրերը: Այդ օրէն Օր. Մարգարիտը դարձաւ իմ հոգեքոյրը և պահապան հրեշտակը:

Հայր Սուրբը մեր երաժշտութեան ուսուցիչն էր: Պահանջկոտ և սոսկալի խիստ: Մանուկներ էինք և կ'ուզէինք քիչ մը զուարճանալ ծամածռելով մեզի խորթ թուացող եւրոպական երաժշտութիւնը ևս տարօրինակ նոթաներու անունները: Սակայն Հայր Սուրբը մեզի շատ շուտ կարգի բերեց: Ոչինչ կը վրիպէր իր ամենատես աչքերէն:

Շուտով նկատեցինք, որ Հայր Սուրբն յարմարութիւն ունէր իր յետն կատարուած չարաճճիութիւնները տեսնելու: Իր զսպողական միջոցները ոչ-քրիստոնէական էին - ականջներս քաշել, ապտակ և «բողբ հանել»: Առաջիններէն մէկն էի պատժուողներէն:

Մէկ օր Ներսիսեան լճի ափին բազմած, պաղպաղակ կը ճաշակէի մանկական ազահութեամբ: Նկատեցի, որ զրօսնողները կը վազէին դէպի վանքը: Ինքս ալ վազեցի: Թանգարանի մօտ խումն բազմութիւն կար, որ շրջապատած էր ծեր մի հոգևորականի: Վերջինս երկարահասակ էր, գեղեցիկ ճերմակ մօրուքով և դանդաղ կ'առաջանար դէպի վանք, աչքերը կիսափակ: Շրջապատողները անոր կը սպառնային սեղմած բռունցքներով և հայիոյանքներով, կը պոռային, կը թքնէին վրան:

Առանց ժամանակ կորսնցնելու ես ալ սկսեցի թքնել հոգևորականի վրայ, թէն ան ինծի շատ մեծ վնասներ չէր հասցուցած և զինքը տեսած իսկ չունէի:

Քիչ մը ետքը մարդիկ սկսան միմեանց հարց տալ, թէ ո՞վ է այս մարդը և յանցանքն ի՞նչ է:

Կողքիս թքագործ քաջերէն մէկը, երևութապէս Ապարանցի մշակ, վերցուց, թէ - «Էս մարդը Սուրբիս Արք.ն է (Պարգեան), կ'ըսեն, թէ մեր Հայրիկի կնիկը պղծեր է»:

Լսողներն աւելի գայթակղեցան և թուքն ու մարտ, հայիոյանքները վերսկսեցան աւելի ուժգին: «Վայ, դու մեր Հայրիկի կնիկը պղծե՞ս, դու էսպէս, էնպէս... »:

Յանկարծ զգացի, որ երկու ականջներս սոսկալի կը ցաւին: Ետնէս մէկը ուժգին կ'ոլորէր ականջներս:

Քիչ ետքը ականջներս ազատուեցան դիմացս մեր Հայր Սուրբը տեսայ - սոսկալի կատաղի դեմքով:

-Ի՞նչ ես անում, դու, անպիտան:

-Հայր Սուրբ ջան, կ'ըսեն թէ ես Սուրբիսը մեր Հայրիկի կնիկը պղծեր է:

-Ի՞նչ ես գլխիցդ դուրս տալիս, յիմար, շուտ, կորիւր աչքիցս, անպիտան դու Գիւմրեցի Կոռ:

Փախայ ձեռքէն, կորսուեցայ ամբոխի մէջ: Երևի Հայր Սուրբի միջամտութեամբ, կամ այլ պատճառով ամբոխը նոսրացաւ և մարդիկ սկսան վազել դէպի վանքի բակը: Ի հարկէ, ես ալ վազեցի: Ամբոխը ներս խուժեց արքեպիսկոպոսի խուցը - բնակարանը և սկսեց կոտորել ու փշրել ամեն ինչ: Ինքս էլ պարապ չմնացի՝ քանի մը ապակի փշրելով: Տեսնեմ, Հայր Սուրբը նորէն ամբոխի մէջ, ասոր անոր հրմշտկելով կ'առաջանայ ներս: Զիս իսկոյն նկատեց, վրայ հասաւ, օձիքէս բռնեց ու թափահարելով ինձ գետին փռեց: Շուտ բարձրացայ և առանց յետ նայելու, գործս լմնցած գտնելով, փախայ ճեմարան:

Յետոյ պարզուեցաւ, որ Սուրբիս Արք. Պարզեանը (պատմական դարձած) ուղղակի գոհն էր գացած ամբոխը գրգռող մարդոց: Ան չէր կրնար «պղծել» Հայրիկի «կնիկ»ը այն պարզ պատճառով, որ Հայրիկը կին չունէր: Ըսին, թէ գրգռիչները Սրբազանի երեսին պոռացած են, թէ ան «Հայրիկի կնիքը կեղծել է»: Հիմա ամբոխն ի՞նչպէս զանազանէր «կնիքը» «կնիկ»էն: Արդէն կնիք բառը անհասկանալի էր...

Յետագային, Հայր Սուրբը մէկ օր մեզի պատմեց զուարճանալով այս միջադէպը, երբ մեծցած աշակերտ էի և ինծի ալ յիշեցուց իմ «քաջութիւնը»:

* * *

Պաշտելու չափ կը սիրէինք մեր Հայր Սուրբը մօտիկ ազգականի նման, այնքան դիրահաղորդ էր, մտերիմ և տաք սրտոտ: Մանուկներուս հետ արտասովոր բարեկամութիւն ունէր: Չէ՞ որ ինքն ալ մանուկ էր հոգուով, պարզունակ, մաքուր բիրեղ հոգուով և անմիջական: Մանուկի նման եռանդ և յարատև աշխատանքի սէր ունէր: Զուարթ, կատակախօս, ընկերական, չարաճճի: Զարմացած կարդացած եմ մէկ երկու տեղ որտեղ երաժիշտ մի հայ օրիորդ իր յիշողութիւններու մէջ զայն կը նկարագրէ իբրև հեզահամբոյր, խոնարհ մի հոգևորական, նուրբ մարդ: Հեզահամբոյր... մեր կրակ ու բոց, վառվռուն Հայր Սուրբը:

Օր մը, զբօսանքի ժամանակ, ետնէս գաղտագողի մօտենալով, իր ձեռքի կաշեպատ

նօթագրքով այնպես վայրագ հարուած մը տուաւ գլխուս, որ աչքերս սնցան: Կարծելով թէ ընկերներէս մէկն է այս վայրենին, գետնէն քար մը փնտռեցի դաս մը տալու անոր, Գիւմրեցու գունաւոր հայհոյանքներս թափելով գլխուն: Երբ ուզեցի քարը նետել, դէմս տեսայ Հայր Սուրբը՝ քահ-քահ խնդալով կաքաւի ձայնով, կողքը Մանուկ Աբեղեան և Ստեփան Կանայեան... Գլխուս ցաւը մոռցայ և սիրոյ ժպիտով նայեցի մեր երեք սիրելի ուսուցիչներուն: Ախ, ինչ մարդիկ էին մեր ուսուցիչները:

Զ'երկարեմ այլ յիշողութիւններ:

* * *

Խրիմեան Հայրիկը վախճանեց: Էջմիածինը լեցուեցաւ երկիւղած հայ հաւատացեալներով: Ամէնքն իրենց որբացած կը զգային, այնքան Հայրիկը սիրուած էր:

Ազգային շատ մեծ սուգ էր:

Հայրիկը պատկած էր իր յաւիտենական քունով փայլուն դագաղի մէջ: Սրբացած ծերունի նահապետի դալուկ երեսը լոյս կ'արտացոլէր:

Վանքի հինաւորց կամարներուն տակ կը ծաւալէին Կոմիտասեան պատարագի և թաղման երգերու ոլորտները, խառնուելով խունկի, ծուխի, ծնծղաններու, քշոցներու և հոծ բազմութեան խուլ և դղրդացող աղմուկին հետ: Դուրսը՝ զանգերու ղօղանջը, թաղման տխուր հնչիւնները, որոնք արձագանգներով կ'երթային հեռուները: Յուզումն աւելի սաստիկ էր, երբ կը լսէինք Հայր Սուրբի կախարդիչ մեներգները իր կաքաւաձայնով:

Կոմիտասն Օրմանեանական էր:

Հասան ընտրութեան ժամանակները: Իրարանցում, բանակոյի թերթերու մէջ: Խուլ տարակարծութիւններ վանքի մէջ, բարեբախտաբար ժողովուրդն անտարբեր էր անուններու դիմաց, երեքն ալ համարեա հեռու, անծանօթ, երեքն ալ ընդունելի:

Գլխաւոր թեկնածուներն էին Իգմիրլեան, Օրմանեան և Դուրեան Պոլսեցի Արքեպիսկոպոսները: Քաղաքական գոյն էր ստացած հարցը, ինչպէս միշտ և ամեն բան Հայերուս մէջ:

Մեր Հայր Սուրբը թունդ Օրմանեանական դուրս եկաւ: Սկսաւ ամեն տեղ անդադար չատագովել Օրմանեան Սրբազանը, գովքն ընելով անոր արտասովոր և բազմակողմանի կարողութիւններուն: Շատ խելօք, դիւանագէտ, զգոյշ, շրջահայեաց, քաղաքավար, միևնոյն ժամանակ հայրենասէր, յառաջադիմական, բարձր ուսումով,

աստուածաբան, պատմագետ, ջերմեռանդ հաւատացեալ, մի խօսքով՝ կատարեալ և յարմար եկեղեցու պետ, ժողովրդի հայր...

Օրմանեանական էին նաև իր հոգևորական և աշխարհիկ ընկերները - Գարեգին, Կարապետ, Յուսիկ և այլ վարդապետները, Մանուկ Աբեղեան, Ստեփան Կանայեան:

Ընտրութիւններէն առաջ մեծ եռ ու զեռ: Կը պատրաստուէինք համերգներու համար: Ի պատիւ արևմտահայ պատգամաւորներու մեզի սորվեցուց պոլսական ազգային երգեր Մեզ նոր արև ծագեց, Արի՛ք, հայկազունք, Մինչ բոյր ի բոյր, Փամ Փորոտան և այլն: Այդ երգերն ինքը չէր սիրեր:

Վերջին փորձին Պոլսոյ պատգամաւորները ներկայ էին և շատ ոգևորուած: Անոնցմէն մէկը ոսկեզօծ պաշտօնական հագուստներով և ոսկեայ սուրով, Կոմիտասին գրկախառնուեցաւ և գոչեց՝ «Հայ ըլլանք, կրօնաւոր ըլլանք»: Այդ բացագանչութիւնը մեզի շատ զուարճացուց, որովհետև թէև ճեմարանական, սակայն կրօնաւոր ըլլալէն շատ հեռու էինք: Այդ ժամանակ ամենքս կը կապկէինք ռուսական նիհիլիստները և Եւրոպացի անհաւատները:

Ընտրուեցաւ Իզմիրլեան: Շրջադարձ մը եղաւ Կոմիտասի համար: Ծայր աստիճան յուսախաբ, դարձաւ դիրազրգիռ, դժգոհ, բարկացկոտ և իր սիրելի ժպիտը և զուարթութիւնը կորսնցուց: Աշակերտներս շատ տխրեցինք Հայր Սուրբի կոճակի նման փոխուելուն: Ընտրութենէն ետքն ալ կը շարունակէր Օրմանեանի գովքը և կը նշէր ընտրողներու կարճամտութիւնը: Հայր Սուրբն այլևս տխուր էր, փոխուած, յուսախաբ:

Այս բանը ոչ մէկ կենսագիր չէ յիշած: Ես շատ զարմացած եմ այս առթիւ:

Իզմիրլեան կաթողիկոսի օծման պատարագը շատ յաջող էր, թէև Հայր Սուրբն անտարբեր էր այս յաջողութեան և միշտ մնաց դժգոհ:

* * *

Օծման արարողութեան ժամանակ ինձ դրաւ, իբրև ամենէն անպէտք ձայն ունեցողը, Ղևոնդ Եպիսկոպոսի տրամադրութեան տակ, ան ալ զիս նշանակեց կերոնակիր: Շատ պզտիկ էի, շապիկս՝ շատ երկար: Սեղանի աստիճաններէն բարձրանալիս Կաթողիկոսը ոտքը դրաւ երկար շապիկիս փէշին, և սայթաքելով յետ ընկաւ, սակայն, բարեբախտաբար, չփռուեցաւ մէջքի վրայ, այլ ընկաւ իր հետևորդներու գիրկը և անվտանգ դուրս եկաւ:

* * *

Զգիտեմ, թե ո՞ր պատարագի, հանդիսաւոր պատարագի միջոցին մեր Հայր Սուրբը շատ գէշ տրամադրութեան մէջ էր և ինքն իրեն բաներ կը քրթմնջէր կիսաձայն, անհասկանալի բառեր և ուշքն ուրիշ տեղ էր, կարծես բացակայ էր իրմէ և մեզմէ: Շարունակ նկատողութիւններ կ'ընէր սեղանի վրայ անհամ երգող սարկաւազներուն և պատարագիչ գառամեալ ծերունի Եպիսկոպոսին, որ իր ձայնը չէր յարմարեցնում խումբի վերջին նոթին, որ տարրական էր: Իր անտրամադրութիւնը խումբի վրայ ազդեց և մենք ալ սկսեցինք անհամ ու անլի երգել, Հայր Սուրբն այնքան էր գերազգրգռուած, որ յանկարծակի, երգը չաւարտած, խումբը թողուց և արագ դուրս եկաւ վանքէն:

Ամենքս շշմած մնացինք Հայր Սուրբի արարքէն, որ մեզի շատ անտակտ թուաց և անընդունելի: Օտար հիւրեր, դուրսէն եկած հայ ազդեցիկ մարդիկ, կաթողիկոսն այնտեղ փառաւոր կանգնած: Կատարեալ գայթակղութիւն: Բարեբախտաբար խումբը շարունակեց երգել տանելի կերպով և իր սիրելի օգնական վաղամեռիկ վանեցի Խոսրով Փախչանեանը շարունակեց ղեկավարելը:

Զարմանալի թող չթուայ, եթէ աւելցնեմ, որ այս յանդուգն միջադէպը ոչ մէկ հետևանք ունեցաւ: Մենք այնքան կը սիրէինք հայր Սուրբը, որ ամեն ինչ ներելի էր անոր: Կեանքիս մէջ այս աստիճանի սիրուած մարդ տեսած չեմ:

Զանազան յիշողութիւններու մէջ կարդացած եմ, թէ յետադէմ միաբաններ և այլ անձնաւորութիւններ կը հալածէին զինքը և հանգիստ չէին տար: Իմ խոնարհ կարծիքով այս պատմութիւնները չափազանցութիւններ են և մինչև անգամ անճիշդ: Էջմիածնի մէջ՝ ոչ ոք հալածած է Կոմիտասը, ընդհակառակն ան ընդհանուր գուրգուրանքի առարկայ էր թէ վանքի մէջ և թէ դուրսը, ժողովրդի մէջ:

Նորէն յիշեմ, որ Հայր Սուրբը մեզի հետ շատ մտերիմ էր, հաղորդիչ, խօսուն, անմիջական: Ոչինչ կը ծածկէր մեզմէ և օրը երկու երեք անգամ կը հանդիպէինք: Ոչ բարով նկարիչ էի և այդ առիթով ինձ հետ շատ մօտիկ էր և մօտ էր ամենին: Այդ «հալածանքներու» մասին ոչինչ ըսած է մեզի:

Իր ծայրայեղ դժգոհութիւնները սկսան Իզմիրլեանի ընտրութեամբ, աւելի շուտ՝ Օրմանեանի չընտրուելուն պատճառաւ:

Ուրիշ բան: Իզմիրլեան Հայրիկ Եպիսկոպոսի աստիճանով վարձատրեց Կոմիտասի ընկերները, որոնք ամենքն ալ Օրմանեանական էին, ինչպէս՝ Գարեգին, Կարապետ, Յուսիկ, Բագրատ և այլ վարդապետներ: Ինչո՞ւ Կոմիտասը վարդապետ մնաց, որ առնուազն հաւասար հոգևոր կոչում ունէր, ձեռներեցութիւն, շնորհ և գիտութիւն:

Հայր Սուրբ, կատարեալ Սուրբ: Ոչ մէկ ակնարկ այդ անարդարութեան առթիւ:

Կոմիտասը վրիժառու չէր, բամբասող չէր և ոչ ալ նախանձոտ: Հսկայ մըն էր ան, հայ երգի հսկայ Սասունցի Դաւիթը:

Իր խօսակցութիւններէն սակայն կը հասկնայինք, որ ան դժգոհ էր իր ժամանակը վատնելով հասարակ երաժշտութեան վարժապետութեան վրայ: Այդ բանը կրնային ըսել հարիւրաւոր շնորհալի միջնակարգ երաժիշտներ, որոնց պատիւ կը բերէր Էջմիածնայ խումբը կառավարել և ճեմարանի ուսուցիչ լինել: Ձինքը պէտք է ազատ ձգէին, որ կարողանար իր պրպտումները շարունակել, ժողովրդական երգերու իր հսկայ պաշարը մշակելու դաշնաւորելու, կարգի բերելու:

Միւս կողմէն Էջմիածնի սեղմ միջավայրը, Վաղարշապատի ցանցառ, սակաւաթիւ ազգաբնակչութիւնը հեռու էին նպաստաւոր լինելէ իր արուեստը զարգացնելու, դրսևորելու: Անոր տեղը հայաբնակ մեծ քաղաքն էր, կիրթ հասարակութեամբ, որ գնահատէր իր արուեստը և խումբ կազմելու հնարաւորութիւն տար՝ հոգալով դրամական ծախսերը: Ինքը դրամ չունէր: Երբ Թիֆլիսի անունը կ'արտասանէինք, աչքերը կը փայլէին Կոմիտասի և ամբողջ մեր հայ ազգի դժբախտութիւնն է, որ այդ հեշտ ու պարզ իրագործելի քայլը չառնուեցաւ: Չէ՞ր կարելի զայն Ներսիսեան դպրոցի խմբավար և երաժշտութեան գլխաւոր ուսուցիչ կարգել: Եկեղեցիներու մեջ խումբը կ'երգէր, բազմաթիւ համերգներ թէ Թիֆլիս և թէ այլուր, դրամն ինքնին կուգար, իր իսկ աշխատանքով, համերգներու եկամուտով, որովհետև կովկասահայ ժողովուրդը երաժշտասէր էր և ընդունակ լսելու նոյն երգերը շաբաթուայ մէջ երկու երեք անգամ, ինչպէս երաժշտասէր էին Պոլսոյ, Իզմիրի, Գահիրէի հայերը, երբ Հայր Սուրբ այնտեղերն հաստատուեցաւ Էջմիածնէն փախուստ տալով:

* * *

Իզմիրլեանի օծման առթիւ յատուկ համերգ պիտի տար ճեմարանի մեջ, վերին միջանցքի երկար սրահը: Ժամանակէն շատ առաջ, Կոմիտասի անունը լսելով, ժողովուրդը լեցուց ճեմարանի ամբողջ շէնքը, այնպէս, որ անհնար եղաւ խումբի անդամները հասցնել բեմի վրայ: Պէտք է ըսած, որ զօրով մի կերպ կնայինք բեմին հասնիլ, սակայն հայր Սուրբը չուզեց կտրականապէս, ինչպէս մերժեց դուրսը կատարել համերգը, երբ աշակերտներս իրեն թելադրել համարձակեցանք: Բարկացաւ և գնաց իր բնակարանը, թողնելով հազարաւոր բազմութիւն հիասթափուած և զարմացած: Այս միջադէպն ալ անցաւ առանց հետքի և հետևանքի ի վնաս Կոմիտասի, միշտ այն պատճառով, որ ան սիրուած էր ամենքէն:

* * *

Եւրոպա կատարած պտոյտէն յետոյ Հայր Սուրբը ճեմարան բերաւ նուագահանդէսի բազմաթիւ գործիքներ: Բերել տուաւ Երևանէն գերման գինուորական մի

քափելմայսթր, որ վարժեցնէ նուագողները: Արդէն լաւ ջութակահարներ կային և փողեր նուագողներ, ինչպէս Ջառայեան Յարութիւնը և Էրզրումի Սանասարեանէն եկած Պաստրմաճեանները: Կարճ ժամանակուայ մէջ Մոցարթէն, Կունոյէն գողտրիկ կտորներ երգեցինք նուագի ընկերակցութեամբ: Սակայն նուագի գործը փճացաւ: Ուսուցիչն անյարմար էր և ուրիշը չկար, Գիւմրին ալ հեռու էր, որ այնտեղէն ուրիշ մէկը գար: Գերման երաժիշտը Մոցարթէն աւելի Էջմիածնայ գինին ու օդին սիրեց: Օդիի և սխտորի հոտը մեզ կը խեղդէր: Մոցարտին տուրը տուինք, վազն անցանք, մեր գործիքներն ալ փչացան, կորսուեցան փռշիներու մէջ: Հայր Սուրբը ամեն ջանք թափեց ազատելու աւերը իր թախանձանքներով, յորդորներով, ականջներս քաշելով, «բողք հանելով», չեղաւ ու չեղաւ: Ինքը մէկ օր հանդիսատես եղաւ հարքա՞ծ Գերմանի ջութակի դասին: Խեղճ քափելմայսթրի մատները կը դողային, կարծես արադի շիշը բռնած ըլլար: Հայր Սուրբը յուսահատ ճամբեց դժբախտ գինեմով:

Եռանդուն Հայր Սուրբը տասնեակ մը տղաք վերցուց երաժշտական բարձր ուսմունք տալու անոնց: Շատ շուտ սկսեցինք բաւական վարժ դաշնաւորել, սակայն, ցաւ ի սիրտ, գործը կիսատ մնաց: Հայր Սուրբը՝ դժգոհ Էջմիածնէն, յուսահատ, մտքով ու հոգիով հեռու էր մեզմէ և հեռուները կը փնտռէր տեղ մը իր գործը շարունակելու համար: Չնայած իր կոտրած սրտին, յամառօրէն խումբը բարելաւեց, ուժեղացուց կանացի ձայներով, գիւղէն հարսներ և օրիորդներ բերելով:

* * *

Հայր Սուրբի երգահաւաքման մասին շատերը գրած են, մանաւանդ Բաղրեան Ստեփանը: Կոմիտասին հետևած եմ Շիրակ՝ Հառիճավանք, Նորաշէն, Մուղնու Սր. Գեորգ, Էջմիածին, որտեղ հեռուներէ եկած գեղջուկները կ'երգէին բազմաթիւ տարբերակներով, բազմաթիւ չափերով ու երանգաւորումներով յարափոփոխ երգեր: Հայր Սուրբը գրի կ'ռնէր փոփոխակները հիացմունքով: Երգերը կայծակի արագութեամբ կը տարածուէին ուխտաւորներու միջոցով Հայաստանի և հարևան երկիրներու չորս ծագերը:

Արձակուրդներէն վերադարձին գիւղերէն և քաղաքներէն նոր երգեր կը բերէինք իրեն: Գրի կ'առնէր գեղջկական երգերը միայն խիստ ընտրութեամբ, յետ կը վանէր աշուղական և յեղափոխական երգերը, որոնք իրեն համար երաժշտական արժէք չունէին: Մեր Գիւմրեցի աշուղ Ֆահրատի, Համբոյի, Տալօենց Գոգորի (Շերամ) երգերը միշտ կը մերժէր առանց որևէ որակում տալու, այնքան զուսպ էր և բարի, շատ բարի:

Հայր Սուրբը միայն գեղջուկ երգերը կը հաւաքէր, յոկուած, հին, կատարելագործուած երգերն ու պարեղանակները: Սակայն, Նիկողայոս Տիգրանեանի յորդորով հետաքրքրուեցաւ նաև աշուղական պարերով և դաշնաւորեց «Շուշիկ»ը, «Երանգի»ն (Ռանգի) և այլն:

Ճեմարանի ծառաներէն էր նշանաւոր Նախօն, որին մենք Նախօ Բիձա կը կանչէինք: Նախօն բերած էր իր հայրենի Սոկսէն Սասունցի Դաւիթի մի փոփոխակ, գրի առնուած Աբեղեանէ, Գաբեզին սարկաւագէ և Ստեփան Կանայեանէ: Նոյն Նախօն երգած է Կոմիտասին պատահականօրէն մեր ամենագեղեցիկ անտունին - «Միրտս նման է», «Արօրն ասաց» և «Սոկաց Միրզէն»:

Ես յաճախ կը մտնէի ծառայանոցը Նախօ Բիձայի երգը և պատումները լսելու խորին ակնածանքով ու սիրով: Բարձրահասակ, նիհար, երկարավիզ մարդ էր, բարակ երկար շէկ պեխերով: Մերկապարանոց թոչունի գլուխ ունէր մեր Նախօ Բիձան, հեզահամբոյր, մտածկոտ և լռակեաց: Գլխի կատարի վրայ միշտ կար ասեղնագործ իր արախչին: Հագուստները՝ Սոկսի տարագով:

Հայր Սուրբը իր հաւաքած երգերը կը զտէր, եղանակները կը հայացնէր, օտար տարբերը դուրս կը նետէր: Ժողովուրդէն կ'առնէր իր երգի գանձը, կը յղկէր, կ'ոճաւորէր և նորէն յետ կու տար իր տիրոջը հայ ժողովուրդին:

Ուրիշ խօսքով, Կոմիտասը երգը համարեա նոյնութեամբ կը թողնէր, սակայն իր անձնական դրոշմը կը դնէր վրան և զայն կը հոգևորէր իր ոճով, կոմիտասեան հոգիով, որ խորապէս հայկական էր: Այդ էր պատճառը, որ ժողովուրդը սիրեց կոմիտասեան երգը, անոր ոճը: Հայր Սուրբը իր նուրբ զգայնութեամբ խորացաւ հայ երգի մէջ և դուրս հանեց, կերպաւորեց գտնուած հայ ոգիով: Կոմիտասը հայ ժողովրդի երգի հաւատարիմ թարգմանն է:

Օրինակ մը: Իմ հայրենի Գիւմրի քաղաքի մէջ հնարած պարեղանակը՝ «Խնկի ծառ», որ կանացի մենապար է, զմայլելի մի պար, որտեղ կինը իր թներու, ձեռքերու և մատներու նագելի և ճկուն շարժումներով խունկի ծառը կը ձևաւորէ, Կոմիտաս մի սքանչելի երգի է վերածել, մեզ ծանօթ երգը, պարի սկզբնական եղանակը իւրայատուկ ոճաւորելով և քիչ մը չափ փոխելով, շատ քիչ և տուած է մեզի սքանչելի նուէրը - «Ալագեազ սարն ամպել ա»: Պարեղանակը տպուած է կոմիտասեան ոչ մշակուած երգերու ժողովածուին մէջ, որ հրատարակած է իր աշակերտ Սպիրիդոն Մելիքեանը: Եղանակը պարզ է, գեղեցիկ, հմայիչ, բայց կոմիտասեան դրոշմը, հոգին չունի:

Յաճախ Հայր Սուրբը չափը փոխելով, այլ գոյն կուտար երգին: Օրինակ՝ «Էս առուն ջուր ա գալի»ն մենք կ'երգէինք դանդաղ, որտեղ առաջին հրեշտակային երեխայական ձայնը սրտառուչ էր, սիրելի:

Հայր Սուրբի հրատարակած տետրակին մէջ չափը փոխուած է, կայտառ, արագ և մենք հաճոյքն ունինք լսելու առուակի կարկաչիւնը, հոսող ջուրը և ուղեկից դաշնակն ալ կուտայ արագ հոսող առուակի ձայնապատկերը, որ կատարեալ է, նոյնպէս հմայիչ ու գեղեցիկ, թէն տարբեր մեր երգած «Էս առուն»էն:

Յայտնի է, որ երգերը, տասնեակ հազարաւոր քառեակները, խնամքով հաւաքուած Մանուկ Աբեղեանի և Կոմիտասի խնամքով, գտուած են և մաքրուած թրքական բառերէն: Զարմանալի է, որ իմ հայրենի Շիրակի մէջ, որտեղ թուրք ու թաթար համարեա չկայ, սակայն ով զարմանք, մեր երգերն ապականուած են թրքերէն բառերով: Իսկական հայը քրիստոնեայ է լայն իմաստով, ներող և այլասէր: Օրինակ՝ տանք այս երգի երկու տողերը, անճոռնի բառեր, սակայն գեղեցիկ եղանակ:

Ղուլիճան ֆայթոն դանիտ կ'ենեմ...

.....

Ալ բլուզիդ դուրբան, չալ բլուզիդ դուրբան,
Մատիսկի կտրած բլուզիդ դուրբան

Տասնչորս բառերէն միայն երկուսն հայերէն, չորսը զուարճալի խեղաթիւրած ռուսերէն, մնացածը թուրքերէն:

* * *

Հոգևոր երգերու վրայ տարած աշխատանքը հսկայական է: Զանոնք ևս զտեց, թէն իրմէ առաջ Թաշճեան և Մակար Եկմալեան սկսած էին Գէորգ Դ. Դերձակեան կաթողիկոսի հրամանով և աջակցութեամբ: Գէորգ չորրորդ, ճեմարանի հիմնադիրը, ձայնաւոր էր, երգի բարձր ճաշակի տէր: Երկուսի գործը Հայր Սուրբը շարունակեց և բարձրութեան վրայ դրաւ հայ հոգևոր երգը, որի ակունքները շատ հինէն կուգան և ժողովրդական են մեծ մասամբ, ինչպէս Կոմիտասը մեզի կարդացած դասախօսութիւններու համեմատութիւններով կ'ապացուցանէր դիւրաւ: Հայր Սուրբը ռումբի նման կը բռնկէր, երբ մեր հին վարդապետները կ'երգէին ժամերգութեան մէջ ազատ տաղեր արաբա-թրքական ծամածուռ գեղգեղանքներով: Ալկունի վարդապետը Խրիմեան Հայրիկին քովը կանգնած կ'երգէր Նարեկացու տաղերէն այս, մեր ոգուն խորթ ու օտար ոճով, հայրիկը կը սիրէր զանոնք:

Դժբախտաբար Պոլսեցի Գէորգ Դերձակեան կաթողիկոսը նախօրօք չէ մտածած մաքրել արևմտահայ եկեղեցիները անճոռնի երգելու ձևէն, որ մինչև Փարիզ, Լիոն, Նիս, Լոնտոն հասած է իբրև մեծ ամօթ մեր բարձր արուեստի համար: Թող ինձ ներեն մեր քահանայ և վարդապետ հայրերը, Լուսաւորչական թէ Կաթողիկէ անխտիր, տիրացուները, սարկաւագները և դպիրները, որոնք իրենց գեղեցիկ ձայներով և բարի կամեցողութեամբ կը շարունակեն երկրէն բերած երգելու ձևն ու առողջանութիւնը, որ թուրք կը հոտի:

Թուրքը մեր ժողովրդական բանահիւսութիւնը մեր իսկ ձեռքով ապականելէ ետք մտած է նաև մեր սրբատեղիները և խաթարած մեր սքանչելի երգեցողութիւնը:

Կոմիտաս վարդապետ «Նաւասարդ» պոլսական հանդէսի մէջ մի նամակ ունի հրատարակուած 1913ին՝ ուղղուած պոլսական մի եպիսկոպոսի, որի մէջ Հայր Սուրբը կը ծառանայ թրքավարի երգելուն և կը խոստանայ, Պոլիս գալով, մաքրել մեր երգեցողութիւնը:

Թող տարօրինակ չթուի, օտար խումբերը մեր Եկմալեան և Կոմիտասեան պատարագները աւելի, շատ աւելի գեղեցիկ կ'երգեն, քան հայ խումբերն անխտիր: Շնորհալի և երոպական երաժշտութիւն ուսած մեր խմբավարները, կիսով չափ հետնելով մեր դասական հոգևոր երգեցողութեան, մեր երգերը կ'աղճատեն «յաւելումներով», յաճախ «ա լա թուրքա» եղանակներով և մանաւանդ թրքական բնորոշ կերպով երգել տալով:

Ես ներկայ գտնուած եմ կաթողիկէ հայրերու մատուցած պատարագներուն, որտեղ խումբերը օտարներ եղած են և օտար խմբավարներէ ղեկավարուած, որոնք ոչ մէկ գաղափար ունեցած են մեր երգի վրայ: Վերջերս այդ պատարագներէն մէկուն մէջ կը մեներգէր հայ խմբավար մը, շատ գեղեցիկ կերպով: Վերջինէս դուրս մէկ տիրացու կ'երգէր հայ ոճով, իսկ պատարագիչն ինքը և միւս սարկաւագները՝ թրքավարի:

Ֆրանսացիներէ կազմուած խումբը՝ սքանչելի, հինգ փորձէ ետքը: Եզրակացութիւնը ինքներդ ըրէք, պարոնայք և սիրելի հայ խմբավարներ:

Կոմիտաս Հայր Սուրբը բազմահմուտ էր արուեստներու մէջ՝ երաժիշտ, գիտուն, բանաստեղծ, նոյնիսկ նկարիչ:

Իր հնարած երգերն և ի միջի այլոց, Յովհ. Թումանեանի գողտրիկ «Կաքաւիկ»ը, Յովհ. Յովհաննիսեանի «Ծիրանի ծառ»ը՝ երգուած իր սիրելի աշակերտ Վահան Առաքելեանէ, շատ սիրուն: Յետագային վերջինս օփերայի երգիչ դարձաւ: Կոմիտասի հմուտ աշակերտներն էին՝ Առաքելեանը, Խոսրով Փախչանեանը, որ իր օգնականն էր խումբի համար, Սաքօ Յակոբեան համակրելի երաժիշտը և Ստեփան Բաղդեան, ասլետ և երգիչ:

Հայր Սուրբը բանաստեղծ էր: Մեզի կարդացած է իր «խաղ»երը, «պարապ վախտի խաղալիք», ինչպէս ինքը կը յորջորջէր, գողտրիկ ոտանաւորներ իւրայատուկ սեփական ոճով, նոյն իսկ արդիական, որ չուզեց տպագրել: Իր մահէն ետքը լոյս տեսան քանի մը կտորներ: Վարդապետը, սկսած էր օփերա գրել, յատկապէս Թումանեանի «Անուշ»ի համար, սակայն հսկայ գործը, ժողովրդական երգերու կիտուած ատաղձը մշակելու արդեօք լի ու լի բաւական չէ՞ր:

Հայր Սուրբը շատ սիրուն կը գծագրէր և փոքրիկ պատկերներ կ'ոճաւորէր: Շատ կը սիրէր մեր հին մանրանկարներն ու որմնանկարները, բարձրաքանդակ զարդերը:

Անշուշտ իր տետրակներուն մէջ՝ գտած են երգիչ հաւքի նկարը իր ձեռքով գծագրած:
Այդ հաւքը իր արուեստի անձնական նշանն էր:

Քանի մը ընկերներու հետ ես ալ ոչ բարով «նկարիչ» էի, աւելի շատ այդ յաւակնութիւնն ունէի: Հայր Սուրբը մեզմով շատ կը հետաքրքրուէր, կ'օգնէր մեզի իր ցուցմունքներով և խորհուրդներով, մինչև անգամ ներկեր կը նուիրէր մեզ, իր աղքատիկ լումայէն: Օր մըն ալ սուրբի համեստութեամբ նստաւ, որ դիմանկարը մատիտով նկարեմ, նկարն ալ վերցուց և տարաւ: Մեր ողորմելի նկարչատունը և նկարները հպարտութեամբ ցոյց կուտար հայ և օտար այցելուներու, Չօպանեան, Թէքէեան, Չիֆթէ Սարաֆ, Սիամանթօ և այլն: Մէկ օր ալ, առանց մեզի նախօրօք իմաց տալու, Թիֆլիսէն բերել տուաւ նկարիչ Գէորգ Բաշինջաղեանը, որ մնաց քանի մը օր և Կոմիտասի յորդորով քանի մը դասեր տուաւ, խորհուրդներ և մեզի համար մէկ երկու փոքրիկ բնանկարներ նկարեց իւղաներկ, յիշողութեամբ:

* * *

Ինչպէս տեսանք, Հայր Սուրբը բարձր լինելով հանդերձ, պարզ էր, շատ մօտիկ վարուող ամենախոնարհ մարդկանց հանդէպ: Հաճոյքով կը մտնէր մեր ընտանիքներէն ներս հիւրասիրուելու: Ուրիշ վարդապետներու նման հպարտ չէր, այլ ընգհակառակն համեստ, խոնարհ և մտերիմ: Ուրախ-գուարթ, առանց մի րոպէ տատանուելու կ'ընդունէր հրաւերը, ներս կը մտնէր, թերևս, կատակախառն խօսքեր, երգ: Անմիջապէս կ'ընտելանար մանուկներու հետ: Չնայած իր արտաքին թեթևաբեան, ամենքը զինքը կը սիրէին ակնածանքով և յարգանքով, այս տիպար հայ հոգևորականը, որը բնաւորութեամբ և իր բարքերով կը յիշեցնէր իտալացի սուրբ Ֆրանչեսկօն, նոյնպէս պարզ համեստ և ժողովրդական:

Կոմիտաս վարդապետը արդէն անպաշտօն ազգային Սուրբն է մեր բազմաչարչար, նահատակուած Սուրբը: Կոմիտասը մեռած չէ, ողջ է և կ'ապրի հայ հոգիներու մէջ՝ թէ ինքն անձնապէս և թէ իր մեծ գործը, հայ երգը: